

Viafier retica vul prevegnir al vandalissem

La sala da spetga a Rabiuis-Surrein ei renovada e puspei aviarta

DA SUSI BEARTH / ANR

■ Per motivs da vandalissem ha la Viafier retica (VR) stuiu serrar avon treis onns la sala da spetga alla staziun da Rabiuis-Surrein ed avon in onn la tualetta publica. Cun in project da pilot innovativ emprova la VR ussa da prevegnir al vandalissem. Vandalissem ei in fenomen social dil qual la Viafier retica vegn buca da fugir. Sper ils donnos vid trens ei oravontut l'infrastructura allas staziuns pertuccada. Aschia ha per exempel era la sala da spetga alla staziun da Rabiuis-Surrein stuiu vegnir serrada il 2006. Dus onns pli tard ha la VR era stuiu serrar las portas dallas tualettas publicas a Rabiuis pervia da vandalissem. Ils vandals havevan buca schau per pauc, tartignau e donnegiau preits, plantschius e mobiliar e fatg empaglia quasi tut. La sala da spetga fuvu aschidadir daventada in local da sentupada per far fiastas, buedrar alcohol e fimar. Schizun ella stanza da spetga havevan ei fatg pliras ga fiug per grillar. Semeglionts cass da vandalissem dat ei en plirs loghens e perquei ei la VR gia dapi entgin temps sfurzada da serrar sias salas da spetga las fins da jamna, duront la notg ni schizun diltut sco a Rabiuis-Surrein.

Project cun scolars

Ton per passaschiers sco per la Viafier retica ein ina sala da spetga e tualettas serradas ina situaziun nuncuntentiva. Damai che l'infrastructura ei avon maun ha la VR priu amauns la reavertura dalla sala da spetga a Rabiuis-Surrein. Per quei intent ha Patricia Demarmels, la menadora da produzioni dalla VR regiun Cueva/Surselva, giu ina buna ed innovativa idea per in project da pilot. Sala da spetga e tualettas ein vegnidas pinadas e renovadas cun integrar las scolaras ed ils scolars dil scalem superiur da Sumvitg.



Las scolaras ed ils scolars dil scalem superiur da Sumvitg han segidau tier la renovaziun dalla sala da spetga alla staziun da Rabiuis-Surrein.

FOTO S. BEARTH

El rom da quei project han ils giuvenils era survegniu ina plattafuorma per atgnas creaziuns. Quella han els nezegiau, ein stai creativs e han realisau in maletg da preit tenor l'idea dalla scolara Vanessa Martin che haveva gudignau ina concorrenza da project en scola. Il maletg dalla matta ei tenius ellas colurs grisch, alv e ner. Ils responsabels dalla VR havevien giavischau in maletg cun colur cotschna. «Jeu hai preferiu grisch – quei plai meglier a mi», ha Vanessa Martin manegiau. La finala ein tuts scolars sepperpetisai vid la preit cun in'impronta da lur maun. «Aschia sperein nus ch'ei detti dapli retenientschas da disfar l'infrastructura», ha Patricia Demarmels detg a caschun dalla fiasta d'inaugura-

ziun e reavertura che ha giu liug il gliendis vargau. Ella speri che sia idea davanti realitad e hagi in avegnir.

In'idea cun futur?

Era Walter Deplazes, il president communal dalla vischnaunca da Sumvitg ed il president da Sumvitg Turissem, Ueli Forster ein cuntents che la sala da spetga alla staziun ei puspei aviarta. Ei hagi dau dabia reclamaziuns perquei ch'ella eri serrada ed ils passaschiers dalla viafier stuevien spitgar ordaviert en tutt'aura. Walter Deplazes ha appellau als giuvenils d'haver quitau dalla stanza da spetga renovada e da tener in egl aviert. Sch'ei vesien auters che fetschien donnos duegien ei empruar da tener anavos quels.

«Tractei la sala da spetga silmeins aschi bein sco vossa combra», ha el detg e raccoltau ina risada dils presents. La renovaziun ha la VR schau custar 10 700 francs – senza quintar l'atgna lavur e quella dils scolars. Ad interim vegn la stanza da spetga aunc a vegnir serrada sur notg. Ella duei denton restar aviarta il di ora e las fins d'jamna. «Nus vegnin a tener in egl aviert e rimnar experientschas», ha Patricia Demarmels annunziu. Sin fundament da quellas vegni ei lu decidiu schebein la stanza vegni era aviarta la notg ni buc. Sche l'idea cul project da pilot a Rabiuis-Surrein secumprova ed il vandalissem lai suent, san ils responsabels dalla VR s'imaginar d'era realisar tals projects en autras staziuns.

«Ei vegn mender e mender»

Giacun Chistell fa uorden allas staziuns dalla VR en Surselva

CUN GIACUN CHISTELL
HA SUSI BEARTH / ANR DISCURRIU

■ Alla fiasta d'inauguraziun dalla sala da spetga renovada alla staziun da Rabiuis/Surrein fuvu era Giacun Chistell presents. Il collavuratur en survetsch da clientella dalla Viafier retica fuvu leds sch'ei dess dameins vandalissem allas staziuns. Las staziuns dalla VR ein loghens da sentupada per la giuventetgna. Quei fatg sco tal disturbass probablamein negin, mo il schliet sedepurtar da certs giuvenils ha negins cunfins ed ei vegn era buca fatg stop avon acts da vandalissem. Giacun Chistell ei quel che sto prender ensem las miardas che vegnan schadas anavos e schubergiar naven la miarda che tacca dapertut. Sch'ei vegness sedepurtau normal allas staziuns fuvu sia lavur aschi lunsch en uorden – mo aschia po ei beinduras unisar. All'Agentura da novitads rumantscha ha el raquintau co ei va tier allas staziuns dalla VR.

Vus luvreis el survetsch da clientella allas staziuns da Trin tochen Mustér. Daco ei gest quella da Rabiuis vegnida serrada avon treis onns?

Giacun Chistell: Il secuntener ei catastofals e quei empau dapertut allas staziuns. A Rabiuis eisi denton lunsch ora il mender. Quei vul denton buca dir ch'ei seigi mo ils giuvenils dalla vischnaunca che fetschien disuorden cheu – ei vegnan da dapertut entuorn. Jeu fetschel dapi siat onns quella lavur ed ei vegn mo mender e mender. Strusch ch'ins ha fatg uorden vesi puspei ora tuttina sco avon.



Tgei donnos havevan ei lu fatg alla staziun da Rabiuis?

Per exempel tartignau ils mirs e plantschius ed ei havevan schizun fatg fiug ella sala da spetga. Era igl automat ei gia vegnius destruius e las tualettas. Quellas vegnan aunc messas en stan ed aviartas pli tard. Las decoraziuns dalla casa-lenn han ei sfraccu naven ed ils bauns ein tudi empaglia. Ella sala da spetga s'emplunava la miarda – ei veseva ora mender ch'in nuegl.

Tgi fa aschia enzatgei?

Quei ei gliעד che vul far discus e s'entaupa alla staziun. Pil solit giuventetgna. Ei fuvu segir flots mats e pulitas mattas, mo ei van vid la butteglia e feman lur «crut» aschia ch'ei pirdan tutas retenientschas e survegnan quasi il «chic» da

vandal entuorn. Senza alcohol va nuot pli tier quels giuvenils.

Il «chic» vegn cun beiber

Ha ei dau uorden alla staziun da Rabiuis cu la Viafier retica ha serrau la sala da spetga?

Na, tuttavia buc. Ina ga han ei schizun rut en la finiastra per far vinavon lur fiastas ella sala. In venderis suentier miezdi hai jeu entupau cheu enzacons giuvenils che havevan gia buiu stuorn e bess las butteglas sils binaris. Dapertut entuorn scalgias. Quels hai jeu fatg rim-

nar ensem sez lur miardas – mo gia l'auter di veseva ei puspei ora tuttina cheu. Igl ei catastofal – tudi butteglas ruttas e miardas dapertut entuorn. Il da gries rimnel jeu ensem e tschei sa lu gleiti esser tuttina a mi.

Ei la staziun aschi giud via ch'ei san far tgei ch'ei vulan?

La casa dalla staziun ei habitada mo per vacanzas e quels hospis ughegian strusch da vegnir giuado cu ei audan canera. Franc dat ei carschi che observan la giuventetgna e vesan flot e bein tgi che fa donnos. Ei vegn denton mirau naven e negin vul dir enzatgei – cun quei secuntener dils carschi hai jeu mias breigias. Jeu hai plidentau pliras mummas da vegnir alla staziun e mirar sche lur affons seigien era leu e fetschien disuorden. Quei ha sulettamein giu igl effect ch'enzacontas salidan buca mei pli. Tenor miu avis fuvu ei era caussa dalla vischnaunca da survegnir in techet tgei che succeda alla staziun. In luvrer da vischnaunca savess per exempel dar mintgat in'egliada.

Manegieis Vus che la renovaziun en collavuraziun culs giuvenils porti mi-giur?

Quei fuvu legrevel – en duas jamnas sai jeu dir sch'igl ei gartegiau. En general vegnin nus denton a prender mesiras pli rigurusas e far dapli controllas. Quels che nus pudein tier survegnan in castitg. Forsa fa ei effect sch'ei ston pagar da pinar ils donnos e far lavur cumina.

Guids da muntogna a Sedrun

■ (anr/sb) Representantas e representants dall'Uniuon svizra da guids da muntogna ein s'entupai la fin dalla jamna vargada a Sedrun. Leu ha giu liug la radunonza annuala dils presidents dallas uniuns regiunalas e dallas secziuns. Uonn ha la Secziun dalla Surselva giu d'organisar la radunonza dils presidents e dallas presidentas dall'Uniuon svizra da guids da muntogna. El rom da quella sentupada ei denter auter era vegniu tematisau il svilup politic dalla lescha naziunala per guids da muntogna. Plinavon han ils presents era discutau la comunicaziun interna ed anoviar dall'Uniuon svizra da guids da muntogna en cass d'in grev accident en muntogna. Las uniuns regiunalas e las secziuns fuorman la basa regiunala e locala dall'uniun tetgala. Ell'Uniuon svizra da guids da muntogna ein ils rodund 1500 guids e las 25 guidas da muntogna diplomai organisai. Sco il president dalla secziun dalla Surselva, Paul Degonda, ha scret en in communicau da pressa stat igl alpinissem classic da stad ed unviern el center dallas activitads dall'Uniuon svizra da guids da muntogna. Cheu s'engascha l'uniun per ina scolaziun e formaziun fundada pil mistregn dil guid da muntogna. Ei vegni purschiu in'instrucziun conforma al temps. Quella satisfetschi allas pretensius humanas, tecnicas e professionalas dils guids e dallas guidas da muntogna dad oz. Sco Paul Degonda ha declarau astgan mo quels che termineschan cun success la scolaziun complementara alla professiun purtar il tetel «guid da muntogna cun certificat professional federal». Sper ils guids da muntogna scolescha l'organisaziun naziunala era scolasts da reiver, menaders da viandar e persunas dil fatg per lavurs da segirtad vid la suga che penda.

Open Air Trun

■ (cp) L_mar, The Wolves, Starch ed Horny and the Gang. Quei ein las bands che sepresantan uonn agl Open Air Trun che ha liug ils 27 da zercladur. L_MAR cun Elmar Deflorin (Ex-Hades) sepresantan cun canzuns romontschas da rock modern d'ozildi. Silsuent concerteschan The Wolves, ina gruppa da hip hop da renum naziunal. Denter auter vegnan els a presentar entginas canzuns dil niev album «fresh». Ils 7 musicists da Starch han denter auter gia concertau al festival da jazz a Montreux ed agl Open Air Sogn Gagl. Cun canzuns da rap, rock e jazz dil niev album «music» empermettan els da far stremblir il Plaun Rensch. Horny and the Gang, ina band da covers econsuent, vegn sco finiziu a far saltar mintga visitader dil 5avel open air.

Ils concerts dallas bands entscheivan allas 20.00 cun L_MAR, the Wolves, Starch ed Horny and the Gang. In event sut tschiel aviert cun buna musica, DJ, ustria, bar, grill ed entgins fiugs el liber dattan a nies open air in'atmosfera tut speciala. Cun entginas midadas dall'infrastructura hai en cass da schliat'aura suttegt per in e scadin. Il bus da notg va en direczion da Laax e Sedrun.

Medemamein vegn Smartconnection puspei ad esser presents cun ina bar da fretgs per far prevenziun d'alcohol.

Sco mintg'onni havein nus semtgau pils fans pigns digl open air in suentermiezdi cun giugs, plinavon han els la pussevillad da cavalcar e da far in cuors da far pizzas. Ils geniturs san en quei mument far diever dall'ustria sil plaz e guder entginas uras pli ruassevillas.

Prevendita als spurteglis dalla banca Raiffeisen Cadi. Ulteriuras informaziuns anfleis Vus sut www.openairtrun.ch